

# LA USC DI LADINS – VENERDÌ 31 AGOSTO 2012

## Tg ladin sun TCA

### L telejurnal ladin cumplësc trèi ani. Cungratulations

Telejurnal - Ai 5 de setëmbër dan trèi ani iel muet sun i canai TCA n telejurnal ladin te na verscion plu longia y laureda ora, che trata argumentazions atueles, che va dala cultura ala politica ma



Cunlauradères de studio a Bulsan, da man ciancia: Paolo Savio, Fabio Amadio, Egon Vinatzer y José Nunez.

tulan nce ite d'uni sort de manifestazions tla trèi valedes ladines Gherdëina, Val de Fascia y Val Badia. L proiet ie unì purtà dant da Egon Vinatzer y azetà dala Region Trentin-Südtirol. L'autoriteies cumpetèntes ti inuemes de Florian Mussner y Luigi Chiocchetti sustèn chësta maniera de fé nformazion tla televizion y dantaldut de rujené ladin ti trèi idioms.

### N gran suzes

L TG ladin (nformatif), che vën renuvà uni ena y mustrà ntan duta l'ena plu iedesc, ie diventà urmei n apuntamënt fërm y aspità da n gran publich. N possa zënzauter di che l suzes ie majer de chël che i autores se aspitova. "L ne n'ie nia sauri a ti sté do o a acumenté duc chiche nes nvieia ala manifestazions desferèntes che va dala cultura al

sport o ala truepa giaurides de mostres, ajache la cumpëida de nosc cunlauradères ie limiteda a pueciscima persones. Ma gën fajons dut l puscibl de vester daniëura personalmënter prejenc y purté te na maniera elastica, nia cumplicheda ma dantaldut senziera la nformazions o vel'otra documentazion," nsci Egon Vinatzer ideadëur tl TG y respunsabl per la Val Badia y Gherdëina. Cun puec mesuns, persones y mo manco tëmp, vëniel fat do la rata de bie programs rics de chedri o filmac; y la resposta dla jënt ie plu che pojitiva.

### Dejideres per l dauni

L TG ladin cumplësc ai 5 de setëmbër trèi ani, cie se aspieta pa Vinatzer per l dauni? "Che la Region nes dà inant la crëta y che pudon lauré inant, povester avëi plu

mesuns finanziaie per tò su mo vel' auter cunlauradëur y nsci garanti n program mo plu atuel y ntier, ma dantaldut che son boni de acumenté inant almanco na pert dla dumandes y nvic. Me mbince nce dantaldut che son boni de acumenté nosc publich che, coche audion, crësc di per di. Nëus dajon duta l'energies per ti fé plajëi nosc program do la rata mo jëunn, sce l nes garata sons cunënc." Coche Vinatzer dij, ie la grupa dl TG ladin limiteda a puecia persones che muessa lauré dassënn per garanti ena per ena l program. Sce te Gherdëina y Badia ti vën a Egon Vinatzer y al cameraman Erwin Albertini unitant judà da vel' cameraman che vën mandà da Trënt o Bulsan, iel te Fascia Silvano Ploner, Michele Carpano y Valentina Zanon cun si operadëures video. L Tg ladin plej y inant ti mbincions n bon lëur y dut l bon per l cumpli di trèi ani. (usc)